

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 8/54

ք.Երևան

09 փետրվարի 2024թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 10.01.2024թ. թիվ 05100034/100124/52/6 որոշման դեմ ֆիզիկական անձ Սեյրան Մնացականյանի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

Ֆիզիկական անձ Սեյրան Մնացականյանը (այսուհետ նաև՝ բողոքաբեր) հայտնում է, որ 2023թ. օգոստոսին Վրաստանից մեքենա է ներկրել ՀՀ: Երբ տեսել է, որ ժամկետը մոտենում է, կատարել է ԱՊՊԱ-ի վճարումները՝ կարծելով, որ այլևս գործողություն չունի անելու և իրեն անգամ չէին էլ զգուշացրել, որ ՊԵԿ-ում պետք է ներկայացնի: Հանգիստ վարել է մեքենան, ծանուցում չի ստացել ժամկետը խախտելու վերաբերյալ և միայն 26.12.2023թ.-ին ներկայացման դիմումից հետո է իմացել:

Բողոքաբերը նշում է, որ մեծահասակ մարդ է 70 տարեկան, մասնակցել է 44-օրյա պատերազմին, թոշակառու է և ունի բազմազավակ ընտանիք:

Ֆիզիկական անձ Սեյրան Մնացականյանը խնդրում է կիրառել նկատողություն կամ նվազեցնել վճարման չափը:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 10.01.2024թ. թիվ 05100034/100124/52/6 որոշման մեջ մասնավորապես նշված է, որ Սեյրան Մնացականյանի անվամբ 01.08.2023թ. Գոգավան-Պրիվոլնոյե մաքսային կետ-բաժնով թիվ 05100034/010823/0000840764/00 մաքսային մուտքի օրդերով ժամանակավոր ՀՀ է ներմուծվել «OPEL ZAFIRA» մակնիշի, HN830HH հաշվառման համարանիշի տրանսպորտային միջոցը, որի ներմուծման վերջնաժամկետը սահմանվել է մինչև 31.10.2023թ., սակայն մինչ այդ ժամկետի ավարտը վերոնշյալ տրանսպորտային միջոցը չի արտահանվել ՀՀ տարածքից, որի արդյունքում խախտվել է հետադարձ արտահանման պարտավորությունը:

Փաստի առթիվ 07.12.2023 թվականին Սեյրան Մնացականյանի նկատմամբ կազմվել է մաքսային կանոնների խախտման վերաբերյալ արձանագրություն՝ «Մաքսային կարգավորման մասին» ՀՀ օրենքի 309-րդ հոդվածի հատկանիշներով: Վարչական գործի լուծմները նշանակվել է 05.01.2024 թվականին ժամը 16:50-ին, իսկ գործի քննություն 10.01.2024 թվականին ժամը 14:00-ին, որի վերաբերյալ վերջինս ծանուցվել է էլ. փոստով:

«Մաքսային կարգավորման մասին» ՀՀ օրենքի 309-րդ հոդվածի 1-ին մասի համաձայն՝ «Ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված մաքսային վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության տասը տոկոսի չափով, բայց ոչ պակաս, քան երեսուն հազար դրամի չափով»:

Այսպիսով, վարույթի նյութերով հիմնավորվում է, որ Սեյրան Մնացականյանի կողմից թիվ 05100034/010823/0000840764/00 մաքսային մուտքի օրդերով ներմուծված տրանսպորտային միջոցի հետագա արտահանման պարտավորության չկատարման համար առկա է «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտման հատկանիշներ, ինչը հիմնավորվում է վարչական վարույթի նյութերով:

Ելնելով վերոգրյալից, ղեկավարվելով «Մաքսային կարգավորման մասին» ՀՀ օրենքի 309-րդ, 322-րդ, 334-րդ հոդվածներով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝ որոշում է կայացվել «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտում կատարելու համար Սեյրան Մնացականյանին ենթարկել վարչական պատասխանատվության՝ տուգանելով 431.540 ՀՀ դրամի չափով:

3. Բողոքարկման առարկային վերաբերվող իրավական կարգավորումներ և եզրահանգումներ

«Եվրասիական տնտեսական միության մաքսային օրենսգրքի մասին» պայմանագրի (այսուհետ նաև՝ Օրենսգիրք) 264-րդ հոդվածի 1-ին կետի համաձայն օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Սույն Օրենսգրքի 259-րդ հոդվածի 2-րդ կետում նշված օտարերկրյա ֆիզիկական անձանց կողմից՝ անդամ պետություններում և Միության անդամ չհանդիսացող պետությունում

գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Անդամ պետությունների ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Նույն հոդվածի 5-րդ մասի 1-ին պարբերության համաձայն՝ ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման»:

«Մաքսային կարգավորման մասին» ՀՀ օրենքի 301-րդ հոդվածի 1-ին մասի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 309-րդ հոդվածի 1-ին մասի համաձայն՝ ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված մաքսային վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության տասը տոկոսի չափով, բայց ոչ պակաս, քան երեսուն հազար դրամի չափով:

Քննարկվող դեպքում Հանձնաժողովը հատկանշական է համարում այն հանգամանքը, որ 01.08.2023թ. լրացված թիվ 05100034/010823/0000840764/00 մաքսային մուտքի օրդերով ժամանակավոր ՀՀ է ներմուծվել «OPEL ZAFIRA» մակնիշի, HN830HH հաշվառման համարանիշի

տրանսպորտային միջոցը, որի ներմուծման վերջնաժամկետը սահմանվել է մինչև 31.10.2023թ., սակայն սահմանված ժամկետում տրանսպորտային միջոցը չի վերաարտահանվել, չի վերահայտարարագրվել մաքսային այլ ընթացակարգով: Անդրադառնալով դիմում-բողոքում մատնանշված այն նկատառմանը, որ ապահովագրական վճարը կատարված է՝ Հանձնաժողովը հարկ է համարում նշել, որ այդ հանգամանքը չի կարող դիտարկվել որպես տրանսպորտային միջոցի հետագա արտահանման պարտավորությունը չկատարելու համար պատասխանատվությունից ազատելու հիմք:

Ելնելով վերը նշված իրավանորմերի դրույթներից, հիմք ընդունելով սույն որոշման 2-րդ կետում բերված փաստական տվյալները՝ Հանձնաժողովը գտնում է, որ վարչական վարույթի նյութերով հիմնավորվում է, որ Սեյրան Մնացականյանի արարքում առկա է «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտում և ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 10.01.2024թ. թիվ 05100034/100124/52/6 որոշումը իրավաչափ է և փաստարկված:

4. Եզրափակիչ մաս

Ելնելով քննության արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը


ՈՐՈՇՈՒՄ Է՝

ՀՀ ՊԵԿ Արևելյան մաքսատուն-վարչության «Վարչական տույժ նշանակելու մասին» 10.01.2024թ. թիվ 05100034/100124/52/6 որոշման դեմ ֆիզիկական անձ Սեյրան Մնացականյանի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

ՀԱՆՁՆԱԺՈՂՈՎԻ ՆԱԽԱԳԱՀ՝



ԿԱՐԵՆ ԹԱՄԱԶՅԱՆ